

曝書亭集

二



曝書亭集卷第一

秀水 朱彝尊 錫鬯

賦

謁孔林賦

粵以屠維作噩之年我來自東至於仙源斯時也壇杏花繁
庭檜甲坼元和之犧象畢陳闕里之榛蕪盡闢旣釋菜於廟
堂旋探書於屋壁乃有百石卒史導我周行牽車魯城之北
縹馬洙水之陽即大庭之遺庫循端木之故場驕孫祔子居
前聖子藏兮在左自黃玉之封緘闕幽宮而密鎖隕長鯨兮
不驚懾祖龍予遠禍除荆棘之叢生罕翔禽之飛墮雨露旣
濡遲景東隅整衣裳之肅肅正顏色之愉愉展謁方終誕尋
往蹟超白兔之深溝撫青羊之卧石爰有草也苞著其名守

之以龜一本百莖我求其德洵圓且靈爰有木也題之以楷
非柏非樅靡癭靡魍歷千禩而長新貫四時而不改惟先師
之遺澤道莫著乎六經配光華于日月若迭奏之琴箏降而
後儒各事采獲中文古文之書先天後天之易目鄭衛以淫
邪誣春秋以深刻藐淫哲之嘉謨恒末師之是則滔滔天下
後死其悲安得起素王於泉壤操筆削而正之我思古人恥
同汚俗或六聘而收身或三詔而逃祿或依李充之山或就
張超之谷潛戶壁于服虔變姓名于梅福入源水子栽桃隱
丹霞子種竹詎如此地桑海不遷可游可息有歌有絃耳不
聞僧尼之魚板目不覩旗鼓之樓船樂土樂土速營一廛願
爲林戶躬耕墓田庶幾近聖人之居讀聖人之書將不得爲
聖人之徒也與

春蒐賦

皇帝御宇十有八年握金鏡運玉璇超百王之聖域漱六藝之神淵德無遠而勿屈聲有濯而彌宣舞兩階之干羽靖萬里之戈鋌雨洗炎洲之瘴波澄閩海之煙聿將秩祀衡岳底定巴滇猶克嚴夫武事洵無逸而有虔乃

命僕臣乃

召司馬選烝徒以大蒐諏吉日於小雅晉鼓則百二威陳虞旌則東西來下車鏤象以煊爛駟飛黃而白赭風清紫陌之塵天闊黃圖之野於是乎駕六駟從百官建九旂總三單經長楊陟上蘭遵路直從橋安歷平原之膺膺瞻秀木之丸丸雲霏霏于五色山磊磊于層巒斯時也穀雨新晴暮春之序劒乍捧乎金人觴甫浮於鶴羽亞繁杏子山郵舒崇桃於野

圃藥苗則的的依闌莒葉則青青被渚粉颺鳳子之衣綠潤
桐孫之乳雉角角子晨飛烏啞啞子晚翥兔趯趯子淺草之
叢鹿呦呦子平林之塢爾乃刷霧鬣騰風髮擊鷺鳥搏毅蟲
落驚雌駭高雄輕裘子不御暄景子方融釋其一面之網射
以九和之弓三驅子四牡一發子五縱於焉斂綏章徹表貊
張幔城羅藻帟息蔭乎高林容與乎秀澤數獸計鮮犒勤讚
獲大庖不盈

乾心有懌用訓儉而昭仁豈丘崇而山積調六膳而作甘飲
三漿其如液則有飛龍之舸鳴鶴之舟梁排雁齒水漲鴨頭
和迴波之妙曲詠在藻於中流沙停振鷺擢起眠鷗白魚湧
躍黃鵠翔留勝昆明之習戰與華林之沂遊於是川后效珍
河宗輸寶山出醴泉地生朱草鐫十鼓於岐陽列三山於蓬

島

天子師湯文之裕民法軒轅之訪道省四野之耕農問百年之耆老照華薄以春曦浹恩膏於靈沼爭擊壤子康衢永銷兵兮海表在昔成王繼序四征弗庭既巡侯甸萬國咸寧暨漢文帝邊宇肅清猶選良家於六郡躬戎服而治兵稽春蒐之盛禮允治世之大經豈其賓客是燕乾豆是營惟居安而必慮斯坐致夫太平敢擬廣成之頌用垂休美之聲

太極圖賦

原夫黃牙欲發蒼精未垠一氣融結萬象胚渾馮馮翼翼烟烟煜煜睢睢盱盱縣縣分分旣龐鴻之莫兆何聲臭之可聞量則包夫清濁質斯合乎昭昏謂虛無而有象運妙有而無鄰鴻靈幽紛泰貞蠢闢混成天地之先互藏陰陽之宅觀動

靜兮無端占迴游兮不隔壁水車之恒轉類果核之未圻爾
其理則貫一象實函三白麟之書莫吐赤雀之籙未銜名雖
傳乎十翼義尚晦乎周昉啓華山之妙蘊藉營道之幽探种
穆祕師授之說朱陸滋異同之談至希至微無偏無側一翕
一施半白半黑外若離玦中如含薏萬物於焉化生五行之
所糾纏成能設位圖往鏡來化一氣甄三才天根啓月窟開
悟儒言於冥蹟允經學之倫魁乃知聖人能備全體先知可
詔後覺大道爲事物之母

天子有簡能之學用廣運而不窮信範圍之非邈願永繪於
丹宸方金鑑之在握

夜明木賦同澤州陳侍郎作

皇帝避暑於興州時維昭陽大淵獻之秋尋捺鉢之舊蹟啓

帳殿於仙陬六屯內肅千廬外周雲容容兮四合水泱泱兮
交流風颭颭兮徐來雨霏霏兮乍收爰有物焉星芒遙逗明
滅露螢之尾吐吞火雞之味謂野燒而不延疑神燈而未輟
迺

命俞騎即而視之是爲鬼木有桺無枝黝同桴炭澀若榴皮
如場之轉碌碌如絳之拽豐碑載以堅車駕之健犢入重關
度平谷選郢匠以運斤俾奄人以司局舍科上槁存堅多心
近

天顏兮咫尺位祕宇之崇深鑽不勞兮司燿燎無灼兮烘熤
等壁夜光類珠宵映方角枕而輝盈比風簾而神定四照儼
若木之華 六宮擬賓連之慶豈非

聖德之咸臨固無遠而弗鏡宜坤珍之畢效雖枯木朽株亦

疇德而瑞

聖

省方賦

歲在甲子曆應上元

聖化翔洽東汜西崑九州之外郡縣重譯而至橋門嘉穀駢穗濁河澂源於時山祇望

幸臣庶上言請欽崇以郊岱或奉符而封巒

天子思省方以設教用求莫而監觀踐六十四民之遙迹省七十二后之彌文吉日旣諏

德音斯布蠲六軍所過之租減四方惟正之賦推

湛恩於槐宸霈解澤於棘路神人交贊遐邇樂附願儲祉以慶成共希光而景驚迺以九月辛卯農事備收七騶始駕百

工方休扈千官於

行所勒五營於道陬旣伯旣禱爰豫爰遊承曲璠之璇蓋建
太常之辰旒導以金鉦瓊鉞驂以紫燕玉蚪鳴葭而雲韶並
和駐罕而星廬外周黃圖三輔青壤千里濟鬲津以無波履
平原其如砥則有單椒秀澤之山側坎飛輪之水橋號鵲華
湖名蓮子踰歷下之舊城尋介丘之遺趾美哉左海山有岱
宗閭啓仙人之石官存大夫之松天雞鳴而躍日

宸駕至而呼嵩徹稽席蒲車之制罷泥金檢玉之封於焉訪
淮土之仙茅驗吳門之白馬渡河則神獻其實遵海而風不
鳴瓦泛藻舟於中流息參旗於大野越南兗與南徐溯吳下
而白下

帝有恩言宣示函夏眺勝國之蒿萊封蔣陵之松櫟

德無施而不徧

恩未沾者蓋寡由是展軫素王之里致齋金絲之堂陳元和之犧象循闕里之宮牆懸車在廟遺硯在牀肅拜杏壇之上翔步檜庭之旁洵禮隆乎三古而事冠乎百王衡律旣同秩祀有典振旅則邇考祥斯遠覽四瀆而經五州乍六旬而還輦

兩宮交悅萬姓齊忭粵若稽古時致太平必命掌故登封告成或紀社首繹繹或禮云云亭亭石城石距之狀金匱玉匱之形祺安禪安之樂封壇覲壇之銘莫不雲連帳殿雷動山庭未有諮詢疾苦彰瘡濁清不警不蹕不震不驚凡高年之耆老尺口之童嬰婦子所集商旅所經咸得覲天顏於咫尺瞻仙仗於郊垌至若

天縱之能溢於筆墨月璧星珠寶題靈式鸞蹤鳳藻被物成飾轢唐帝之八分陋宋宗之飛白扁榜我我發舒心畫蔭之華棖勒之貞石誠與日月雲漢共昭垂於無極者也

湘湖賦

歲柔兆困敦予是月維陽辭鑑水之一曲兮言歸故鄉遵大路于蕭山兮猶勾踐之舊疆舍予舟于城闕兮別問渡于陂塘踐荒塗之幽辟兮山是越而湖湘圍列岫之周遭予匯一水于中央蓴絲苻帶齊消歇予澄百頃之波光相茲湖之寥闊兮溯蒼蒼之葭葦漾輕舠而如所如予逾五里而十里鮮澤農之耕作兮但眾師之棲止雉角角以飛鳴予鷺媚媚而停峙瞻牛頭與苧蘿予信不遠而伊邇愛山川之清淑予斯生長夫西子洵明豔之絕倫予直夫差之一死以餘暨爲諸

暨予驗往牒之非是眺越王之故崢予丁國步之速遭會稽
不可保予稱臣妾而播遷游臨江而祖道予奏哀曲于烏鵲
迨返國而渡三津予惟八臣四友謀猷之後先既十年而生
聚予更教訓之十年簡俊士之四萬兮率君子之六千誕一
舉而治吳兮齊衣錦而師旋讎九世而當復兮豈身恥辱而
忘焉志既立而轉死爲霸兮胡後之人獨不然他山難久留
兮問西陵而前路夕既濟于錢唐兮尚踟躕而回顧徒弔古
而慨慷兮惜年歲之遲暮

水木明瑟園賦

并序

僕生平不耐作賦雖以賦通籍非稱意之作不存也康熙甲
申八月陸上舍貽書相要過上沙別業遂汎舟木瀆取道靈
巖以往抵其間則吳趨數子在焉愛其水木明瑟取以名園

上舍延賓治具飲饌豐潔主客醉飽留七日乃還念勝引之
難再也成賦一篇先民有言人各有能有不能賦非僕之所
能也辭曰

度十畝之地葺宅一區止有阡而可越渾分沙而不淤翦六
枳而捷藩因雙樹而闢閭嘉水木之明瑟愛徑畛之盤紆山
有穴而成岫土戴石而名咀碧兩判而得路萼四照予盈株
園之主人則陸生稹也匪聲利是趨惟古訓是茹鼓枻而吟
帶經以鉏不隱不仕無礙無拘良辰既撰爰遣莊奴筆疏告
吾商飈乍肅赫暑早祛葵傾芳步柰秀華芙桂英粟綻阜莢
條麤苔縛厥帝鑣刈其蕪井汲綈綆牀轉轆轤靡塵不滌靡
穢不除可以譚讌可以歌歆夫子惠顧跂屨無虞於是竹垞
一叟誕發僧廬遵彼橫塘津逮岑隅風塘傘竹日漏衣袂亦

有同調數子素心相於水抽其帆陸柅其車不速而集語笑
軒渠離坐貫坐或跣或趺生也敕中廚封兩輸誠食饌之次
第傳方法于腰胸乃羹乃淪間以脯脰款則有蒲鮓則有菹
擘翠房之鮮葍剥紫芡之員珠旋棊改令覆斗傾盃倒季路
之十榼慕宣尼之百觚生起避席顏色敷愉稱園雖小聊可
以娛夫子賦之可歟否歟叟曰可哉吾思魯鈍母疾而徐於
焉閉關納屨自晨及晡拂几案屏氍毹挹勺水注蟾蜍默聳
羸肩潛捋短鬚雖有千慮終成一愚譬諸奏事四足而非馬
書券三紙而無驢爾乃舍左思之席溷投鍾繇之筆杼循蘭
陵踐椒塗躡聽雨之樓梯登升月之窻逌流覽帷林蕩漾方
壺心傾意寫志豁神攄留宿宿兮信信忽便便兮諸諸而曰
猗茲園之怡曠予經夫差之故都駐我馬于高岡兮想越來

之師治吳傷西子之不作兮徒憑弔于交衢聆寶屨而聲銷
予剝紅心之草鋪嗟宮牆流水之入予驗妖夢之非誣旣上
山而下山予復自田而之湖回瞻巖椒之夕陽兮挂霄漢之
浮圖逼茶隴之葱青兮占稻田之豐腴耘雖資乎疆以兮獲
免發彼租符眺松臯之明秀予步衡薄而跼蹐辭八門與七
堰兮遠肥膩之姑蘇望之叢叢蒨鬱卽之羅羅清疎旣外隈
而內隩亦前消而後沮磴希偪側丘不崎嶇澗無飲虎穴少
潛狙石梁緩度坦坦舒舒春則桃殷李縞夏則筍白櫻朱薔
一丈予爛漫香五木予紛敷架層闌之曲录刺不慮夫牽挈
又有同心宿蕙並蒂新蕖未八月而剝棗先九日已囊萸野
芳斷予復續湛露晞予更濡訝鷓鴣之撲鹿縱烏鳥之畢逋
喈喈楚雀汎汎江鳬雀則有轂鳬則有雛翠羽定巢而不去

文鱗在藻而忽徂非無牛宮豚柵麋茅兔罝羝藩鹿砦雉艾
雞笊螃蟹設斷鱸鮪施罟寧寬便了之僮約而免責其辛劬
彼玉山之仲瑛暨光福之良夫連峰列岫夾澗通瀟豈若斯
之一丘一壑不見其隘而祇見其有餘且客獨不聞茲園經
理之初邪曩有高士蜚遁山謁履穿東郭面垢左徒垂蘆簾
于紙閣然窮葉于瓦壚朋慵迎予勿送戶罷闔而不逾柏雖
生兮上槁桐已齟而无膚斯人去予猿鶴散幸茅亭之尚在
對魚幢之咫尺而轉覺其空虛生乃取介白之遺字吾鄉徐高士白舊居
于此上舍請崑山徐吉士昂發大書介白之亭扁縣之縣擘窠之大書志先民之軌躅作後學
之範模豈非仁心仁術視富貴利達買宅者攸殊今吾與諸
子飲食宴樂于此倡予和女安知後之游者覩題壁之作不
曠世而相感誦清風之穆如重爲告曰四坐莫誼吾言不渝